

“kamu”, “engkau”, dan seumpamanya ini digunakan terutamanya kepada orang-orang yang sebaya dan tidak pula khusus untuk suatu kehormatan kepada seseorang kerana yang ditemuramah orang Indonesia maka telah sewajarnya wartawan-wartawan radio dan televisyen dan sesiapa pun hendaklah menggunakan perkataan yang lazim digunakan di Indonesia dengan erti yang difaham oleh orang Indonesia dan bukan oleh Lee Kuan Yew.

Adakah Lee Kuan Yew menghendaki digunakan perkataan “awak” terhadap kepada tawanan-tawanan yang berasal dari Jawa dan Sulawesi atau daripada orang yang bukan dari Sumatera? Sedang perkataan “awak” itu pula ada dua pengertian yang dimaknakan oleh orang di Sumatera dan Tanah Melayu. Umumnya di Tanah Melayu perkataan “awak” itu bererti “tuan”, “engkau” atau “kamu” tetapi di daerah lain di Sumatera dan mungkin juga ada di Tanah Melayu ini bererti “kita”.

Perkataan kehormatan di Indonesia kepada seseorang yang berpangkat atau yang ada nama dan dihormati ialah “bapa” atau “pak” iaitu sebagai ganti perkataan tuan di zaman penjajah.

Nampaknya mengenai bahasa Melayu sungguhpun Lee Kuan Yew mungkin telah belajar tetapi belum mendalam dan tidak tahu pula tatatertib dan perbahasaan serta adat istiadat dan peraturan yang dipakai di dalam golongan-golongan orang-orang yang berasal dari darah Melayu di gugusan pulau-pulau Melayu ini. Ini jelas dan nyata kerana ia bukan Melayu – ia seorang Cina yang sentiasa menggunakan lidahnya, terutamanya pada masa yang akhir-akhir ini, menurut yang kita lihat, bahawa sifat-sifat

kemelayuan adalah menjadi sifat-sifat yang sangat dibenci oleh Lee Kuan Yew.

* * *

Fitnah Yang Berbahaya

Tidak ada seorang pun yang tidak mengetahui bahawa Malaysia terjamin masa depannya hanya dengan perpaduan. Tidak ada umat Melayu yang tidak mengetahui bahawa bangsa Melayu telah berkorban dengan sebanyak-banyaknya di dalam menukuhan Malaysia ini. Mereka menerima anak-anak dagang yang datang ke mari sebagai warganegara yang berhak sama bahkan, kerana sialnya penjajah British di Semenanjung Tanah Melayu itu, anak-anak dagang itu telah menguasai ekonomi Tanah Melayu.

Hak-hak utama bagi bangsa Melayu sebagai anak negeri ini, sesudah adanya Malaysia ini tidak pula menyenangkan kepada anak-anak dagang dan kerana di dalam pelajaran, di dalam ekonomi hampir-hampir dibolot oleh mereka, terutamanya di Singapura ini maka nampaklah belangnya kepada kita bagaimana kita yang tadinya memandang orang Melayu penduduk asal negeri ini sebagai tuan rumah telah berubah menjadikan mereka itu sebagai musuh yang mestilah dihancur dan dibinasakan. Di hadapan umum mereka menyebutkan bahawa mereka berusaha untuk membantu orang-orang Melayu tetapi bantuan diberi hanya melepaskan batuk di tangga sahaja bahkan ada setengah-setengah pemimpin-pemimpin mereka yang mengatakan tidak dapat diberikan bantuan berterang-terang sebab takut kepada anak-anak dagang yang lain yang lebih banyak daripada orang Melayu.